

Communicaziun a las medias – SRG SSR Svizra Rumantscha (SRG.R)**Il premi SRG.R 2019 per la scola primara da Donat***Cuiria, ils 10-05-2019*

Il premi SRG.R va quest onn en la Val Schons a la scola primara da Donat en reconuschienscha da sia premura per la tgira e promoziun da l'idiom sutsilvan. Il premi vegn surdà a chaschun da la radunanza generala da la SRG.R ils 15 da zercladur a Laax.

La SRG.R surdat mintg'onn in premi a personas u instituziuns che s'engaschan a moda extraordinaria per linguatg e cultura rumantscha. Sco suletta scola sutsilvana ha la scola da Donat adina puspè da cumbatter per meds d'instrucziun actuals e moderns. Per il pli translateschan las scolastas ed ils scolasts gist sezs il material d'instrucziun, e quai è adina er cumbinà cun engaschament e lavur supplementara.

La scola da Donat è la suletta ch'instruescha il rumantsch sutsilvan. Enfin la 3. classa vegn instrui sulettamain sutsilvan, a partir da la 4. classa vegn il tudestg pli e pli impurtant, ed en la scola superiura dominescha lura il tudestg. Ils scolars Rumantschs han dentant vinavant lecziuns da rumantsch empè da talian e pon eleger il talian sco rom facultativ.

L'onn 2010 ha la scola da la Val Schons fatg in pass fitg impurtant, ha ditg il manader da la scola Philipp Hugentobler sin dumonda. La Val Schons ha numnadamain fusiunà sias scolas, uschia ch'ils uffants da l'entira val pon eleger suenter la scolina schebain els vulan ir a scola rumantscha u tudestga. Quai saja stà il salvament per la scola da Donat.

Actualmain dumbra la scola da Donat 29 scolaras e scolars. 10 dad els van en l'emprima classa.

L'onn 2003 avevan ils trais vitgs da Pazen, Farden e Donat fusiunà a la vischnanca da Donat. Cun la fusiun è lura er ils nums tudestgads da las vischnancas – fin lura Patzen e Fardün - daventads rumantschs. Quai er sco consequenza logica ch'ils bun 230 abitants da la vischnanca discurren per gronda part rumantsch sutsilvan.

Il premi SRG.R è dotà cun 8'000.- e vegn surdà a chaschun da la radunanza generala da la SRG.R ils 15 da zercladur a las 10:30 en l'aula Grava a Laax.

LEGENDA FOTO

Scolaras e scolars da la scola da Donat durant la pausa.

Il Cussegl dal public ha prendì ils gieus da RTR sut la marella

En general survegnan ils gieus Kikeri6 e Top trais bunas notas dal Cussegl dal public (Cdp) da la SRG.R. Il Kikeri6 saja interessant da tadlar ed ins possia adina puspè emprender insatge. La qualitat da las dumondas saja dentant differenta e dependia dal moderatur che haja semtgà ellas. Il Top trais plascha medemamain. Sulettamain la cuntinuaziun suenter il giu na plascha betg. Il Cdp propona perquai da tematisar pli profund il toc da musica per il qual i va mintgamai en il giu Top trais. Main laud survegn il giu Tge chaussas. Quel saja plaunsieu isà, ed ì fiss bun da remplazzar quel è il tenor dal Cdp. Il manader actualitad RTR Valentin Schmed ed il schefredactur RTR Flavio Bundi che han participà a la seduta han prendì encunter questa critica. Els èn conscients ch'il giu ch'exista gia dapi 15 onns en questa furma na cuntenta betg tuts. Il Cdp ha fatg propostas per novs gieus. Quellas vegnan examinadas enfin la fin da l'onn.

In sguard enavant

En la seduta dal settember metta il Cdp il focus sin trais temas: l'applicaziun Play RTR, la nova cumparsa da la pagina d'internet rtr.ch e la musica al Radio Rumantsch.

Infurmaziuns davart il Cussegl dal public SRG.R

Il Cussegl dal public è in gremi consultativ independent ch'accumpogna la lavur ed il svilup dal program da RTR Radiotelevision Svizra Rumantscha cun constataziuns e propostas. Il Cussegl dal public sa raduna per regla quatter giadas ad onn. El observa singulas purschidas da program, emissiuns ed offertas online da RTR. Il Cussegl dal public SRG.R procura per in stretg contact tranter ils responsabels dal program ed il public. El sa cumpona da 15 commembers.

Per dumondas ed ulteriuras infurmaziuns:

Roger Tuor, president dal Cussegl dal public SRG.R, telefonin 079 436 34 87

Sandra Carisch-Killias, secretariat SRG.R, telefon 081 255 79 79, telefonin 078 722 53 73